


Norme vir *huidiglik*

**Author:**Gerhard B. van Huyssteen¹ **Affiliation:**¹Center for Text Technology,
North-West University,
South Africa**Corresponding author:**Gerhard van Huyssteen,
gerhard.vanhuysteen@
nwu.ac.za**Dates:**

Received: 29 May 2018

Accepted: 31 July 2018

Published: 27 Sept. 2018

How to cite this article:Van Huyssteen, G., 2018,
'Norme vir *huidiglik*',
Literator 39(2), a1526.
<https://doi.org/10.4102/lit.v39i2.1526>**Copyright:**© 2018. The Authors.
Licensee: AOSIS. This work
is licensed under the
Creative Commons
Attribution License.

Norms of *huidiglik*. In Afrikaans, *huidiglik* is a truly Janus-faced word: it is being used with high frequency in especially spoken language, while at the same time being one of the biggest language pet-peeves of language practitioners (and even ordinary speakers of Afrikaans). When asked why *huidiglik* should be avoided, these language practitioners and language users often cannot provide any reasoning about it. A comprehensive literature review also reveals that linguists and language practitioners often give contradictory, or even linguistically incorrect reasons for why *huidiglik* is supposedly not acceptable in (standard) Afrikaans. By comparing a variety of normative grammaticographic sources (such as reference guides and prescriptive grammars), this article shows that: (1) *huidiglik* originated, on a balance of probability, in the 1970s in the South African Parliament; and (2) apart from stylistic preferences (e.g. that it sounds pretentious, feigned and affectatious), none of the linguistic arguments against *huidiglik* holds water. In a supplementary article in this issue of the journal it is being illustrated that *huidiglik* is alive and well in written (Standard) Afrikaans.

Inleiding

Die woord *huidiglik* kan met reg 'n tweestertjakkals in die Afrikaanse woordeskat genoem word. Aan die een kant is dit 'n woord wat in gesproke Standaardafrikaans 'steeds in elke derde sin opduik' (Kapp 2014), maar aan die ander kant word dit dikwels eerste genoem as dié taalverskynsel wat 'n 'doring in menige se vlees is' (Luther & Pheiffer 2013).

Die eerste opname van *huidiglik* as lemma in 'n Afrikaanse woordeboek, vind 'n mens in die derde uitgawe van die *Handwoordeboek van die Afrikaanse Taal* (Odendal 1994; voortaan HAT, met uitgawenommer in boskrif, ook wanneer verwys word na Luther, Pheiffer & Gouws 2015):

hui'dig-lik bw. Nieuvorming waarvan die gebruik deur die meeste kundiges afgekeur word; tans, nou, op hierdie oomblik, teenswoordig, in hierdie tyd.

Metterjare het die inskrywing in die HAT grootliks onveranderd gebly, behalwe dat in die jongste uitgawe met die klassifikasie as nuievorming weggedoen word. Die enigste ander aanlyn woordeboek wat eksplisiet (anders as byvoorbeeld implisiet in voorbeeldmateriaal) melding van *huidiglik* maak, is die *Pharos Groot Woordeboek Afrikaans en Nederlands* (ANNA 2011):

huidig b.nw., **huidige** b.nw. (Opm. 1. In Afr. word 'huidige' slegs attributief en in die verboë vorm gebruik. 2. In Afr. word 'huidig' en 'huidiglik' in bywoordelike funksie dikwels gehoor, maar dit word deur kundiges meestal as onaanvaarbaar beskou).

Gegewe hierdie woordeboekinskriftings, kan woordeboek- en ander taalgebruikers met reg vra:

1. Wie is hierdie kundiges waarna die woordeboeke verwys, en wat is hulle argumente teen die gebruik van *huidig* en *huidiglik*?; en
2. Beide woordeboeke stel dit dat *huidiglik* 'dikwels' gebruik word. Hoe dikwels word *huidiglik* in eietydse Afrikaans gebruik?

Die doel van hierdie artikel is om die eerste van hierdie twee vrae te beantwoord; die tweede vraag (en ander subvrae wat in hierdie artikel geopper word) word in Van Huyssteen (2018) behandel. In die volgende afdeling word die bronne wat vir hierdie navorsing gebruik is, breedvoerig bespreek. Daarna word probeer om die oudste optekening van *huidiglik* na te spoor, ten einde die gesprek oor die woord te kontekstualiseer. In die daaropvolgende afdelings word alle taalkundige argumente wat al oor *huidiglik* en sy basiswoord *huidig* (voortaan *huidig[lik]*) aangevoer is, opgesom en beoordeel. Ten slotte word hierdie gegewens oorweeg om 'n standpunt te formuleer oor die interne norme (d.i. met betrekking tot grammatikaliteit) (Carstens 2018:28) wat tans ten opsigte van *huidig(lik)* sou kon geld.

Read online:Scan this QR
code with your
smart phone or
mobile device
to read online.

Bronne

Benewens die artikels in bogenoemde woordeboeke, kan literatuur oor *huidiglik* in drie genrekategorieë verdeel word:

1. Populêre literatuur:
 - a. Tydskrifartikels of koerantrubrieke
 - b. (Mikro)blogs op die wêreldwye web (www)
 - c. Reaksies deur taalgebruikers in die gedrukte media en op die www
2. Normatiewe grammatikografiese literatuur:
 - a. Inskrywings in naslaangidse
 - b. Besprekings in grammatika-, styl- en handboeke
3. Wetenskaplike literatuur: Slegs een wetenskaplike artikel is aan *huidiglik* gewy, te wete Prinsloo (2003) se leksikografiese beskouing.

In hierdie artikel word primêr gebruik gemaak van 'n vergelykende grammatikografiese studie, d.i. 'n vergelyking van die literatuur in 2. hier bo. Die volledige versameling van 40 grammatikografiese bronne wat deur Kirsten (2016:62–65) geïdentifiseer is, is as wegspringplek gebruik. Hierdie versameling is aangevul met soveel as moontlik ander soortgelyke bronne waarin iets oor *huidig(lik)* gesê word, waarna ander literatuur soos in 1. en 2. hier bo genoem, betrek is. Alle beskikbare literatuur word in Tabel 1 opgesom.

Ter wille van 'n diachroniese perspektief, word slegs drie outeurs of bronne wat nie *huidig(lik)* vermeld nie, in Tabel 1 opgeneem, te wete De Villiers (1959) vir 'n vergelyking met De Villiers (1981; 1986); Du Plessis (1979) vir 'n vergelyking met Du Plessis (1981); en Van der Merwe (1956; 1967) vir 'n vergelyking met Van der Merwe en Ponelis (1982; 1991). Om dieselfde redes van diachroniese vergelyking, word verskillende uitgawes van dieselfde bron ook soms ingesluit, byvoorbeeld én Carstens (1989) én Carstens (2018); én Müller (2003) én Müller en Pistor (2011); ensovoorts.

Tensy anders vermeld, kom alle voorbeeldmateriaal in hierdie artikel uit die versameling tekste in die Virtuele Instituut vir Afrikaans se Korpusportaal: Omvattend (voortaan VivA-KPO; VivA 2018); kyk Van Huyssteen (2018) vir 'n uitvoerige uiteensetting van hierdie versameling.

Oudste optekening van *huidiglik*

Soos wat uitlatings oor die frekwensie van *huidiglik* dikwels anekdoties is, so ook is die enigste optekening oor die eerste voorkoms van die woord. In een van sy bundels herinneringe skryf oudpolitikus Japie Basson uitgebreid oor *huidiglik* (Basson 2006:168–171). Hy waag 'n bewering 'dat *huidiglik* sy reis in die Volksraad by John Vorster begin het tydens 'n bespreking van sy begrotingspos as Eerste Minister' – iewers rondom 1971 (d.i., 'ongeveer vyf-en-dertig jaar gelede'). Hy vertel:

By die behandeling van 'n begrotingspos in die ou Volksraad is die minister wie se pos onder bespreking was, onbeperkte tyd toegelaat om op vrae en kritiek te antwoord. ... [P]remier Vorster [het] die gewoonte gehad om by sý posbehandeling

rustig met die een voet op die sitbank te staan, sy elmboog op die knie te laat rus en met die ander hand tussen die notas op sy lessenaar te vroetel om te besluit op wie en waarop hy volgende wou antwoord. So soekende het hy gewoonlik aanhou praat, meestal dralend totdat hy weer met sy antwoord koers ingeslaan het.

Dit was met so 'n oorgang van een onderwerp na 'n ander waarin hy sy woorde as 't ware laat sleep het, dat die Eerste Minister die woord *huidig* gebruik het, en 'n merkbare oomblik later die *-lik* daaraan gelas het. (Basson 2006:169)

Gegewe dat die Hansardverslae van daardie jare nie digitaal beskikbaar is nie, is dit byna onmoontlik om 'almal na te slaan om die bewysplaas te probeer vind' (id.). Selfs al sou 'n mens so 'n handmatige soektog begin, is 'n mens nie eers seker dat 'die Hansard-skrywers se snelskrif dit inderdaad opgeneem het' nie (id.).

By 'n gebrek aan bewyse vir die teendeel, wat is die oorwig van waarskynlikheid dat hierdie anekdote waar is of sou kon wees? Hier volg 'n paar argumente:

- Die Eerste Minister se toesprake het in daardie dae veel gewig gedra, en die waarskynlikheid is dus groterig dat ander amptenare (insluitende Hansardskrywers, vertalers en teksredakteurs) kennis sou neem van sy taalgebruik, al was dit dalk selfs onbewustelik. Soos Basson (id.) dit stel: '... die feit [is] dat die jaarlikse omvattende bespreking van 'n Eerste Minister se stuurmanskap as so 'n belangrike debat gegeld het dat dit die één geleentheid was waar dit vir die hoë amptenare van al die departemente nodig was om in hul sekretariële banke teenwoordig te wees'.
- Die feit dat die eerste kommentaar op *huidiglik* in 1981 verskyn (kyk Tabel 1), gee moontlik 'n aanduiding dat die woord eers in die 1970s sy opwagting in gesproke Afrikaans gemaak het. De Villiers (1981) beweer dat '[k]abinetsministers, politici, predikante, landbouamptenare, studente en ander ... die woord soms op hierdie manier [gebruik], veral by openbare geleenthede' [outeur se eie nadruk].
- Die oudste sitaat in geskrewe Afrikaans wat met behulp van 'n Googlesoektog opgespoor kon word, dateer uit 1974 en dan wel in 'n akademiese konteks. In die *Journal of the South African Veterinarian Association* word die 1973-presidentsrede (dus gesproke teks) van A.B. la Grange (1973) gepubliseer, waarin hy sou sê: 'Die Staat is vir 30 jaar nie meer die enigste werkgewer nie en huidiglik staan meer as 50 persent van ons lede slegs in die private praktyk'. (Let wel: Binne 'n kwessie van 'n maand waartydens hierdie artikel geskryf is, het die datum van die oudste publikasie in Google Books verskuif vanaf 1981, tot 1977, tot 1975, tot 1974 – soos wat meer publikasies gedigitaliseer en aanlyn verskyn het. 'n Mens kan dus nie met hoë sekerheid op 1974 as die oudste publikasiedatum van *huidiglik* reken nie.)
- In *Afrikaanse taalkwessies* (Van der Merwe 1956) en sy opvolguitgawe *Die korrekte woord* (Van der Merwe 1967) word geen sprak gesprook oor *huidig(lik)* nie, maar vanaf

TABEL 1: Oorsig van grammatikografiese literatuur.

Outeurs	Jaar	Genre	Korrek	Gangbaar	Steurend				Foutief			
					stil.	mod.	veroud.	onekon.	w.soort	w.vorm	angl.	geen
Carstens	1989	(Hand)boek	-	-	x	x	-	-	x	-	-	-
Carstens	2003	Rubriek	-	-	x	-	-	-	-	-	-	x
Carstens	2018	(Hand)boek	-	-	x	x	-	-	x	-	-	-
Combrink	1993	Rubriek	-	-	x	-	-	-	-	-	-	-
Combrink	1995a	Rubriek	x	-	-	-	-	x	-	-	x	-
Combrink (ook oor <i>huidig</i>)	1995b	Rubriek	-	x	-	-	-	-	-	-	-	-
Combrink	1995c	Rubriek	-	-	x	-	-	-	-	x	x	-
Combrink	1996	Rubriek	-	x	x	-	-	-	-	-	-	-
Combrink en Spies	1994	Naslaangids	-	-	x	-	-	x	-	x	x	-
De Villiers	1959	Naslaangids	-	-	-	-	-	-	-	-	-	-
De Villiers (oor <i>huidig(lik)</i>)	1981	Rubriek	-	-	-	x	x	-	-	-	x	-
De Villiers (oor <i>-lik</i>)	1986	Rubriek	-	-	x	-	-	-	x	-	-	-
Du Plessis	1979	Naslaangids	-	-	-	-	-	-	-	-	-	-
Du Plessis (oor <i>huidig</i>)	1981	Naslaangids	-	-	-	-	-	-	x	-	-	-
Eksteen	1985	Rubriek	-	-	x	x	-	-	x	x	-	-
Hiemstra (oor <i>-lik</i>)	1980	Naslaangids	-	-	-	-	x	x	-	-	x	-
Kapp	2014	Blog	-	-	-	-	-	-	-	-	-	x
Luther en Pheiffer	2013	Naslaangids	-	-	-	-	-	-	x	x	x	-
Müller	2003	Naslaangids	-	-	-	-	-	-	x	-	-	-
Müller en Pistor	2011	Naslaangids	-	-	-	-	-	-	x	-	-	-
Prinsloo	2003	Wetenskaplike artikel	-	x	-	-	-	-	-	-	-	-
Prinsloo	2013	Rubriek	-	x	-	-	-	-	-	-	-	-
Prinsloo en Odendal	1995	Naslaangids	-	-	-	-	x	x	-	-	-	-
Scholtz	1990	Rubriek	-	-	x	-	-	-	-	x	-	-
Spies	1990	Rubriek	-	-	-	-	-	-	-	x	-	-
Van der Merwe	1956	Naslaangids	-	-	-	-	-	-	-	-	-	-
Van der Merwe	1967	Naslaangids	-	-	-	-	-	-	-	-	-	-
Van der Merwe en Poneis	1982	Naslaangids	x	-	x	-	-	-	-	-	x	-
Van der Merwe en Poneis	1991	Naslaangids	x	-	x	-	-	-	-	-	x	-

stil., stilisties; mod., modieus; veroud., verouderd; onekon., onekonomies; w.soort, woordsoortelike gebruik; w.vorm, woordvorming; angl., anglisme.

die 1982-uitgawe (Van der Merwe & Poneis 1982) word *huidig(lik)* uitvoerig behandel. Hieruit kan 'n mens dalk ook aflei dat *huidiglik* eers in die 1970s ontstaan of toegeneem het.

Of *huidiglik* daadwerklik in die mond van John Vorster ontstaan het, is moeilik te bewyse. Daar is egter genoeg argumente om met 'n hoë mate van sekerheid aan te neem dat *huidiglik* in die 1970s in die gesproke Afrikaans van amptenare beslag gekry het.

Die normatiewe en preskriptiwistiese gesprek rondom *huidiglik* moet ook teen hierdie agtergrond gesien, verstaan en beoordeel word. Aan die een kant kan 'n mens sê dat daar in die 1980s en 1990s 'n hoogbloeit in die publikasies van normatiewe grammatikografiese bronne was – vergelyk byvoorbeeld in Tabel 1 die relatief groot getal naslaangidse wat in hierdie twee dekades verskyn het, teenoor die getal in die tydperk 2000 tot 2018. Daar was dus duidelik in hierdie tyd 'n groot behoefte aan en 'n mark vir sulke normatiewe naslaangidse, en van die prominentste Afrikaanse taalkundiges en taalpraktisyne het gewoon aan dié behoefte beantwoord.

Aan die ander kant had dié skrywers nie geredelik toegang tot korpusse en middele om korpusse te deursoek nie.

Standpunte is daarom dikwels op eie ervaring, waarnemings en intuïsie geskoei – soos die heersende en aanvaarbare praktyk in die taalkunde in hierdie tydperk was. Met hierdie en die komplementêre artikel (Van Huyssteen 2018) wil ek dus die hiaat vul deur die gesprek oor *huidiglik* binne 'n kontemporêre, deskriptiewe raamwerk te plaas, asook om die winste van 'n korpuslinguïstiese benadering tot voordeel van die debat aan te wend.

Grammatikografiese vergelyking

In Tabel 1 word 'n opsomming van al die beskikbare grammatikografiese literatuur oor *huidig(lik)* gegee. By elke bron word 'n interpretasie gegee, d.i. of die outeur *huidig(lik)* as korrek, gangbaar, steurend (maar nie noodwendig verkeerd nie) of foutief beskou. Die argumente van elk van hierdie kategorieë word hier opgesom.

- **Korrek:** Van der Merwe en Poneis (1982; 1991) is voorlopers om te sê dat die bywoordelike gebruik van *huidig(lik)* nie noodwendig verkeerd is nie, maar voeg by dat dit stilisties steurend is ('... hoewel dit maar bra deftig en boeierig klink'). Ofskoon Combrink ook *huidiglik* in die meeste van sy publikasies afkeur (kyk hier onder), sê hy tog dat die *-lik*-morfeem 'n nadruksfunksie kan hê: '...

die fyn spreker of skrywer gebruik dié *-lik* om te sê: ek is ernstig. Dink maar aan die “onlogiese” *goddelooslik*. (Combrink 1995a; kyk egter ook hier onder vir sy kritiek teen die gebruik van die *-lik*-morfeem).

- **Gangbaar:** Op grond van gebruiksfrekwensie in die spraakmakende gemeenskap meen Combrink (1995b; 1996) en Prinsloo (2003; 2013) dat *huidig(lik)* in bywoordelike funksie wel as gangbare Afrikaans beskou moet word en dat woordeboeke hierdie werklikheid behoort te reflekteer. Soos Combrink (1995b) dit stel: ‘... *huidig* is huidig deel van die taalskat van meningvormende Afrikaanssprekendes. En as *huidig* deel is, dan is daar ook nie meer geldige besware teen *huidiglik* nie’.
- **Sturend:** ‘n Aantal argumente word aangevoer waarom die gebruik van *huidig(lik)* sturend is, selfs al is dit nie noodwendig foutief nie:
 - **Stilisties:** Die meerderheid outeurs beskou *huidig(lik)* as ‘oormatig deftige Afrikaans’ (Carstens 2018). Combrink noem *huidig(lik)* in verskeie publikasies ‘n ‘amptenaraanse tydsbywoord’ wat ontstaan het uit ‘deftigdoenery’ (1993).
 - **Modieus:** Die heel eerste beskouing van *huidig(lik)* deur ‘n taalkundige is De Villiers (1981) se siening dat dié twee woorde modeverskynsels in Afrikaans is, wat veral deur ‘[k]abinetsministers, politici, predikante, landbouamptenare [en] studente ... by openbare geleenthede’ gebruik word. Sy standpunt sluit dus by die amptenaraanse siening aan, aangesien *huidig(lik)* die ‘goeie ou gewone woord met sy duidelike betekenis en funksie’ (Ekstone 1985:29) verdring.
 - **Verouderd:** Teenoor (of in samehang met?) sy beskouing dat die gebruik van *huidig(lik)* ‘n modeverskynsel is, wys De Villiers ses jaar later (1986) daarop dat die gebruik van adverbialiserende *-lik* ‘nie deesdae in Afrikaans aan te beveel [is] nie’. Hy sluit eksplisiet by Hiemstra (1980:32, 72–73) aan wat skryf dat ‘in die hedendaagse taal het die *-lik* oortollig geword en gebruik ons dit slegs as ‘n bewus argaïese (ouderwetse) vorm, wat by ‘n aantal woorde te pas kom om soms ‘n deftige of Bybelse kleur daaraan te verleen’ (1980:72). Prinsloo en Odendal (1995:80) is selfs van mening dat die gebruik van *huidiglik* aan ‘t afneem is in ‘openbare toesprake’ (maar agt jaar later meen Prinsloo (2003) wel dat *huidiglik* sodanig gevestig is dat dit verdien om in woordeboeke opgeneem te word).
 - **Onekonomies:** Talle outeurs suggereer of sê eksplisiet dat adverbialiserende *-lik* ‘oorbodig [of] langdradig’ (Combrink 1995a) is, aangesien die meeste bywoorde meestal sonder die *-ik* kan staan ‘met weinig verlies’ (Combrink & Spies 1994:76), of dat ‘ekonomiese alternatiewe’ (Prinsloo & Odendal 1995:80) gebruik kan word. Menige outeur stel dit egter duidelik dat daar niks fout is met die adverbialiserende *-lik* nie, veral waar dit met ‘n nadruksfunksie gebruik word (byvoorbeeld ‘Sekerlik!’ teenoor ‘Seker!’).¹

1. In ‘n informele meningsopname wat op 18 April 2018 in ‘n Afrikaanstalige Facebookgroep geplaas is (<https://www.facebook.com/groups/taaloggas/permalink/1821128854584585/>), dui 81% van die 239 respondente aan dat hulle

- **Foutief:** Sommige skrywers wat *huidig(lik)* sturend vind, dui ook aan dat dit foutief is, byvoorbeeld Scholtz (1990) wat *huidiglik* nie net sturend vind nie, maar ook aandui dat dit van ‘twyfelagtige herkoms’ is. Ander outeurs (bv. Spies 1990) meen dat *huidig(lik)* reëlreg verkeerd is, en wel om die volgende aaneengeslote redes:

- **Woordsoortelike gebruik:** Soos ANNA (2011 [kyk hier bo in die afdeling Inleiding]), wys ook Carstens (2018:134–135) daarop dat *huidig(e)* in sy gewone gebruik slegs ‘n adjektief is. Volgens dié argument kan *huidige* in Afrikaans gebruik word, terwyl *huidig* en *huidiglik* (hetsy as bywoorde of predikatiewe adjektiewe) foutief is. Hoewel geen van die outeurs eksplisiet daarvoor is nie, kan ‘n mens aflei dat hulle met ‘predikatiewe adjektief’ eintlik ‘onverboë adjektief’ bedoel, d.i. dat slegs *huidig*, sonder die attributiewe *-e*, aanvaarbaar is.
- **Woordvorming:** Voortspruitend uit die vermeende verkeerde woordsoortelike gebruik, kom die argument dat gebruikers dan *huidiglik* vorm op basis van die niebestaande *huidig*:

Die taalkundige beswaar teen *huidiglik* is dat die stam vóór die *lik*, waarop die likwoord veronderstel is om gebaseer te wees, nie bestaan nie. Ons ken naamlik in Afrikaans nie *huidig* nie, net *huidige*. Anders gestel: likwoorde word in Afrikaans op basis van predikatiewe byvoeglike naamwoorde gevorm. Voorbeelde van likwoorde wat op basis van predikatiewe b.nwe gevorm is, is *jammerlik*, *goediglik* en *waarlik*. Maar ons ken in Afrikaans slegs die attributiewe *huidige*, met sy slote. (Combrink 1995c)

Spies (1990) interpreteer die vorming van *huidiglik* selfs heeltemal anders as ander taalkundiges. Hy wys daarop dat gebruikers:

‘dink *huidig* is soos *gretig* en *virig* met die agtervoegsel *-ig* gemaak’, maar dat dit nie waar is nie: ‘Die *-dig* (nie *-ig* nie) van *huidig* is ‘n verswakte vorm van *dag*. *Huidig* was eers “hierdie dag”’ (Spies 1990).

- **Anglisisme:** Die meeste outeurs wys daarop dat *huidiglik* se vorming anglisties is: ‘[H]*uidiglik* kon nie spontaan in Afrikaans, volgens Afrikaanse patroon, ontstaan het nie, dit is ‘n geforseerd Engelse deelvirdeel [*sic*] vertaling van *presently*’ (Combrink 1995c). Hierdie argument hou in dat die Engelse adverbialiseerder *-ly* (bv. in *law-ful-ly*) nie *-lik* in Afrikaans as ekwivalent het nie; hiervolgens sou woorde soos *wett-ig-lik* ook daarom ongrammatikaal wees.
- **Geen rede:** Twee outeurs (Carstens 2003; Kapp 2014) stel slegs dat *huidiglik* verkeerd is, maar verskaf geen rede nie.

Beskouing: *Huidiglik* is sturend

Geen van die argumente wat aangevoer word dat *huidig(lik)* stilisties sturend, modieus, verouderend of onekonomies is, bied grondige redes om die woord anders as ander soortgelyke woorde in woordeboeke te behandel, of om gebruikers wat die woord gebruik, te kapittel nie.

‘sekerlik’ sal antwoord op die vraag: ‘Kan jy my dalk gou help?’. Die ander 19% kies ‘seker’ as antwoord.

Sogenaamde stylfoute is immers bloot steuringe (of stylgebreke) wat 'ernstige gebruikers van Afrikaans ... [behoort] te vermy in soverre dit moontlik is' (Carstens 2018:381) [outeur se eie nadruk]. Stilistiese keuses is en bly 'n subjektiewe kwessie van smaak: Wat een taalgebruiker as 'n stylfout in 'n bepaalde konteks beskou, kan binne 'n ander konteks deur 'n ander taalgebruiker as effektief en gepas aanvaar word.

Die feit dat Combrink (1996) *huidiglik* as amptenaraans beskou, impliseer dat die gebruik van die woord volgens hom tipies in amptenaarstaal aangetref word, en 'n mens sou dan juis kon verwag om *huidiglik* in 'n korpus van regeringstekste aan te tref, of andersins in ander tekste wat in formele Standaardafrikaans geskryf is. Combrink (1996) gebruik egter die term 'amptenaraans' derogatief, d.i. as die taalgebruik van iemand wat hom of haar deftig en geleerd wil voordoen. Sels binne hierdie konteks impliseer dit lank nie dat die woord foutief of ongrammatikaal is nie – dit is en bly die keuse van die gebruiker om dit binne bepaalde kontekste te gebruik, net soos wat hy of sy na hartelus stopwoorde, clichés, oormatige beeldspraak, modewoorde, argaïsmes, sleng of jargon na gelang van die kommunikasiesituasie mag gebruik.

In Van Huyssteen (2018) word die frekwensie van *huidiglik* ondersoek, ten einde te probeer bepaal of dit steeds as modeverskynsel beskou moet word (De Villiers 1981), of dit juis verouderd is (De Villiers 1986), of dit slegs in amptenaarstaal voorkom, of *huidig* – soos in Nederlands – 'tot de deftige schrijftaal beperkt' is (volgens die artikel uit 1907 in die *Woordenboek der Nederlandse Taal* (WNT) – De Vries & Te Winkel 1864–1998), ensovoorts.

Beskouing: *Huidiglik* is foutief

Met betrekking tot die sienings dat *huidiglik* foutiewe Afrikaans is, is daar hoofsaaklik drie argumentasielyne. Elkeen van dié argumentasielyne word in die volgende subafdelings in oënskou geneem.

Argument: *Huidig* word slegs in sy verboë vorm gebruik en is dus nie beskikbaar vir ander morfologiese prosesse nie

Alvorens die argument krities oorweeg word, is dit noodsaaklik om waar te neem dat Afrikaans, soos Duits en Nederlands, in den brede geen vormlike onderskeid tussen adjektiewe en bywoorde van wyse maak nie:


Hengeveld (1992:68–69) classifies English typologically as a 'specialized language' ('differentiated' in Hengeveld, Rijkhoff & Siewierska 2004) because this language has a word-class for both adjectives and manner adverbs, English having developed the adverbial suffix *-ly*. This feature distinguishes English from other Germanic languages, where the unmarked (e.g. Dut. *snel*, Ger. *schnell* 'fast') or neuter (e.g. Sw. *roligt* 'funny') form of the adjective is used for adverbial functions (and some suffixes for specific functions). To put it in the words of Hengeveld (1992:65), **Dutch (and other Germanic languages) 'combines the functions of adjectives and manner adverbs'**. (Hummel 2014:35) [outeur se eie nadruk]

Dit sluit ten nouste aan by Kempen (1969:49) se beskouing dat daar drie kategorieë van adjektiewe en bywoorde in Afrikaans onderskei moet word:

1. Daar is woorde wat tradisioneel b.nwe. genoem word, wat nie bw.-funksies het nie, bv. *Stellenbosse, goue*.
2. Daar is woorde wat tradisioneel bwe. genoem word, wat nie b.nw.-funksies het nie, bv. *gister, oorkant, mos, darem*, ens.
3. Daar is woorde wat tradisioneel b.nwe. en [sic] bwe. genoem word, bv. *groot, hard, lelik, sleg*, wat in elke opsig dieselfde kenmerke het en dus as één woordsoort beskou kan word, naamlik wat A.S. Theron [1964] *Kwaliteitswoorde* genoem het. (Kempen 1969:49)

Visueel kan hierdie verdeling met 'n venndiagram soos in Figuur 1 voorgestel word. Kempen (1969) se eerste kategorie word tipies in linguistiese analises (vergelyk bv. Booij 2010) gemerk as ADJ, die tweede as ADV en die derde as A (d.i. die deelversameling van adjektiewe en bywoorde). Benewens die voorbeelde wat Kempen (1969) verskaf, is alle ander ADJ-voorbeelde in die diagram woorde wat in AWS¹¹ (Taalkommissie 2017) met die etiket (*attr.*) gemerk is, wat daarop dui dat dié adjektiewe nie predikatief of as bywoorde gebruik kan word nie; alle ADV-voorbeelde is in AWS¹¹ met (*bw.*) gemerk, wat eksplisiet daarop dui dat hulle nie as adjektiewe gebruik kan word nie.

Anders as Hengeveld (1992) spesifiseer Kempen (1969) nie dat die oorvleueling noodwendig met bywoorde van wyse is nie, maar uit die benoemer 'kwaliteitswoord' (Kempen 1969:49) sou 'n mens wel dalk tog die afleiding kon maak. Van Schoor (1983:59, 110) noem dié soort woorde 'hoedanigheidsbywoorde' en stel dit eksplisiet: '... ons moenie die bywoord en die b.nw. as teenstellings sien nie. Soos die b.nw. na die bywoord kan oorloop, gebeur ook die teenoorgestelde ...' (Van Schoor 1983:59–60; kyk ook Diepeveen & Van de Velde 2010). Hy verwys na sulke gevalle met identiese vorms maar verskillende funksies as grammatiese homonieme (Van Schoor 1983:62, 110) en gee voorbeelde soos *kaalvoet, barvoets, binnensmonds, bloedig,*



FIGUUR 1: Venndiagram van adjektiewe en bywoorde.

broekskeur, dwars, goedsmoeds, heftig, inderhaas, ingedagte, maklik, ruimskoots, deeglik, doelbewus, doelgerig, droëbek, drogies, droogweg en eenparig (Van Schoor 1983:110).

Hoewel meer (vergelykende) navorsing oor die saak nodig is, volstaan ek vir die doeleindes van hierdie artikel met die aanname dat die oorgrote meerderheid Afrikaanse adjektiewe ook as bywoorde kan optree. Daar is dus in teorie geen rede waarom *huidig* nie in sy verboë en onverboë vorm as adjektief kan optree, én in sy onverboë vorm as bywoord sou kon funksioneer nie. Uit korpusdata blyk dit dus ook inderdaad die geval te wees; vergelyk die volgende voorbeelde:

1. *Huidig* as adjektief: verboë

Hoewel die Wêreldgesondheidsorganisasie (WGO) verklaar het dat die huidige uitbraak van Ebola 'n wêreldwye noodtoestand veroorsaak het, ... bly berigte oor die aansteeklikheid daarvan ... baie teenstrydig.

2. *Huidig* as adjektief: onverboë

Kuns kan gedefinieer word as 'n vorm van kultuuruitdrukking en kan dui op voorwerpe of uitvoerings, huidig of histories, en die prestisie daarvan word ondervind deur diegene wat dit gemaak het, ontdek, uitstal of besit.

3. *Huidig* as bywoord

Aangesien die Ovambo's die grootste bevolkingsgroep in die land is en ook die meerderheid van die huidige regerende SWAPO-party uitmaak, is die offisiële antagonisme teenoor Afrikaans in 'n mate verstaanbaar.

Soos uit dié gebruiksevalle blyk, hou die standpunt dat *huidig* 'slegs attributief en in die verboë vorm gebruik' word (ANNA 2011), nie stand nie. In Van Huyssteen (2018) word die frekwensie en spreiding van sowel *huidig(e)* en *huidiglik(e)* verder ondersoek.

Argument: *Huidiglik* is morfologies wangevormd

Spies (1990) meen dat *huidig* morfologies ontleed moet word as *hui-dig*, waar *hui-* 'hierdie' beteken en *-dig* 'n verswakte vorm van *dag* is. Daar is egter geen taalkundige gronde vir hierdie analise nie. Alle Nederlandse etimologiese woordeboeke wat by etymologiebank.nl geraadpleeg is, is dit eens dat *huidig* 'n Oosmiddelnederlandse of Middelnederduitse afleiding van *huden*, 'n wisselvorm van *heden* 'hede; vandag' is (Philippa et al. 2003–2009). Dié afgeleide vorm het na alle waarskynlikheid ontstaan na analogie van die Duitse *heutig* 'met betrekking tot vandag, hierdie dae', wat reeds in die agtste eeu in Oudhoogduits bestaan het as *hiutig*, of in Middelhoogduits as *hiutec* of *hiutic* (Philippa et al. 2003–2009) – moontlik afgelei van *hiutu* ('vandag') plus die afleidingsuffiks *-ig/-ic* (Wiktionary 2018; <https://en.wiktionary.org/wiki/heutig>). In Middelnederlands is die woord meestal geskryf as *hudig(en)* (opgeteken uit 1405; Van Veen & Van der Sijs 1997) of *hudich/hûdich* (opgeteken uit 1409; Philippa et al. 2003–2009; Van Wijk 1936 [1912]), terwyl ons in Vroeë Nieunederlands *huydige(n)* aantref (opgeteken uit 1624 en 1664; Philippa et al. 2003–2009). Hierdie etimologiese uitleg van *huidig* repudieer Spies (1990) se morfologiese analise volledig.

Hoewel *huidig* eintlik sinchronies as ongeleed beskou kan word (d.i., dat dit gewoon 'n Nederlandse oorerf is), sou dit nie verkeerd wees om te sê dat twee morfologiese konstruksieskemas *huidiglik* ten grondslag lê nie:

4. *-ig*-skema²:

$[[a]_{N/P} \cdot ig]_A \leftrightarrow [MET \text{ DIE AARD VAN SEM}_{N/A}]_A$

bloed-ig; jeugd-ig; afgunst-ig; dik-vell-ig

5. *-lik*-skema³:

$[[a]_{Ai} \cdot lik]_{Aj} \leftrightarrow [SOOS \text{ SEM}_{Ai}]_{Aj}$

jammer-lik; lieflik; ryk-lik; siek-lik,

waar [a] = enige stam(allelomorf); A = deelversamelingklas van adjektiewe en bywoorde of adverbialia (kyk Figuur 1); N = naamwoord; P = frase; SEM = semantiek of betekenis van die betrokke stam; i en j = indekseringstekens; en die dubbelyl op die ooreenkoms tussen die realiserings- en konseptualiseringspool dui (kyk Van Huyssteen 2017 vir 'n gedetailleerde uiteensetting van die noteringskonvensie).

Komplekse wat met die afleidingsmorfeem *-ig* gevorm word, word meestal as adjektiewe gebruik (byvoorbeeld *bekk-ig*, *drift-ig* en *ernst-ig*; Kempen 1969:506). Sulke adjektiewe kan ook meestal as bywoorde gebruik word: vergelyk 'n *driftige*_{ADJ} toespraak en *driftig*_{ADV} beduie; 'n *ernstige*_{ADJ} man en *ernstig*_{ADV} praat met die kinders. Volgens Kempen (1969:507) funksioneer slegs een geval, te wete *naarstig*, uitsluitlik as bywoord. Soos reeds hier bo in die etimologiese analise aangetoon is, is dit duidelik dat *huidig* ook aan hierdie gevestigde woordvormingspatroon van Afrikaans voldoen, dan wel met die betekenis [MET DIE AARD VAN DIE HEDE].

Wanneer *-ig*-woorde as prenominale attributiewe adjektiewe gebruik word, word hulle konsekwent met behulp van die attributiewe *-e* verbuig en is dus nie vir verdere morfologiese prosesse beskikbaar nie. Dit is m.i. op grond van die hoë frekwensie en prominensie van *huidig-e*_{ADJ} (teenoor die lae frekwensie van *huidig*_{ADJ}) dat taalkenners tot nou toe die aanname gemaak het dat *huidiglik* nie 'n moontlike bousel is nie. Ons moet egter daarop let dat waar die attributiewe *-e* verdere morfologiese prosesse uitsluit, dit nie die *-ig*-skema geld nie; vergelyk byvoorbeeld gevalle soos *mens-waard-ig-heid*, *ge-mat-ig-d-e* en *breed-voer-ig-er*. Die woord *huidig*_A is dienooreenkomstig as basis vir die *-lik*-skema in (5) beskikbaar.

Kempen (1969:535) wys daarop dat *-lik* as toevoer werkwoorde, selfstandige naamwoorde en byvoeglike naamwoorde kan hê en dat die afvoer byvoeglike naamwoorde en bywoorde is 'waarvan (a) die meeste albei funksies kan hê en (b) enkeles net bwe. is, bv. *beswaarlik*, *dadelik*, *deerlik*, *gewoonlik* ens'. Dit sou dus in beginsel moontlik wees dat *huidiglik* óf beide funksies kan hê, óf slegs as bywoord funksioneer. In Van Huyssteen (2018) word dié saak verder ondersoek, maar wat hier relevant is, is die feit

2. Slegs die tersaaklike aspekte van die *-ig*-skema word hier weergegee en behandel. Vir 'n volledige oorsig, kyk Kempen (1969:506–510).

3. Slegs die tersaaklike aspekte van die *-lik*-skema word hier weergegee en behandel. Vir 'n volledige oorsig, kyk Kempen (1969:534–539).

dat *-lik* sonder twyfel ook as adverbialiseerder in Afrikaans (soos ook *-lijk* in Nederlands – vgl. Booij 2018) optree. Gegewe dat daar ander bywoorde (en selfs prominente gevalle soos *dadelik* en *moontlik*) is wat op *-lik* eindig, kan ons die konstruksionalisering (Hüning & Booij 2014) van *huidiglik* motiveer aan die hand van analogisering as meganisme wat tot taalverandering lei (Traugott & Trousdale 2013). Nóg faktore wat gebruik kan word om die konstruksionalisering van *huidiglik* te motiveer, word hier onder voorgehou.

Soos Combrink (1995a) merk Kempen op dat daar 'meesal 'n mate van betekenisintensivering in woorde op *-lik*' is (1969:538). Hy gaan voort:

'Miskien verklaar dit waarom so dikwels, logies gesproke oorbodiglik, 'n *-lik*-vorm gebruik word wanneer die woordkorrelaat van die stam daarsonder feitlik dieselfde sou beteken, bv.

gans onmoontlik : *ganselik onmoontlik*
'n gek spulletjie : *'n geklike spulletjie*
'n goddelose spul : *'n goddelooslike spul*
naarstig soek : *naarstiglik soek*, ens.

Die lys [van 153 woorde wat op *-lik* eindig] bevat 13 sulke gevalle, naamlik nog *ryklik*, *sekerlik*, *sieklik*, *sotlik*, *stiptelik*, *vryelik*, *vuriglik*, *wonderbaarlik*, *wyslik*. (Kempen 1969:538)

Hiervolgens sou 'n mens dit hipoteties kon stel dat die voorbeeldsin in (6), wat uit VivA-KPO onttrek is, met meer nadruk as (7) herskryf kan word. Of 'n skrywer of spreker dit so bedoel, en of 'n leser of hoorder dit so interpreteer, is stof vir verdere navorsing. Wat egter binne die konteks van hierdie artikel van belang is, is dat dit as nóg 'n motivering vir die konstruksionalisering van *huidiglik* dien. In navolging van Traugott en Trousdale (2013:27–29, 198–203) kan gesê word dat die aanvangskonteks 'n uitbreiding van die pragmatiek (te wete die intensie om te benadruk) behels en dat dit gevolglik tot die simbolisering daarvan (oftewel semantisering, d.i. die vorming van 'n vorm-betekenis-paar) lei deur van die adverbialiserende *-lik* gebruik te maak. Hierdie suffiks dien egter nie net die doel om uitdrukking aan die nadruksbehoefte te gee nie, maar ook om potensieële woordsoortelike meerduidigheid eksplisiet op te klaar (kyk ook weer die opmerking oor *seker* vs. *sekerlik* hier bo):

6. *Gevolglik is daar huidig geen wettige mark vir renosterprodukte nie.*
7. *Gevolglik is daar huidiglik geen wettige mark vir renosterprodukte nie.*

Tot slot 'n waarneming oor die suffikskombinasie *-ig-lik*: Anders as by kombinasies soos *-end/t-heid* of *-ig-heid*, maak Kempen (1969) geen melding van die kombinasie *-ig-lik* nie. Dit laat 'n mens dus wonder of *-ig-lik* wel 'n 'geldige' kombinasie van suffikse is. Twee argumente wat die geldigheid van *-ig-lik* ondersteun, kan aangevoer word:

- Woorde wat op *-ig-lik* eindig, kom reeds voor in van die oudste tekste wat in formele Standaardafrikaans geskryf is. In die 1911–1920-geedeelte van die *Historiese Korpus*

van *Standaardafrikaans* (HKSA) (Kirsten 2015) is daar byvoorbeeld drie gevalle, te wete *goed-gunstiglik* [sic], *naarstiglik* en *gewilliglik*. In al die periodes daarna tref ons ook *-ig-lik*-woorde in die HKSA aan (met *huidiglik* wat sy opwagting vir die eerste keer in die 2001–2010-periode maak).

- Die *-ig-lik*-kombinasie kom ook dikwels in hedendaagse geskrewe Afrikaans voor; vergelyk Van Huyssteen (2018).

Argument: Die gebruik van die suffiks *-lik* as adverbialiseerder is anglisisties

Die doel van hierdie artikel is hoegenaamd nie om 'n bydrae tot die anglisimedebat⁴ te lewer nie, behalwe om dit te stel dat ons daarvan bewus moet wees dat daar in den brede twee benaderings tot die begrip 'anglisme' is, te wete preskriptiewe beskouings (bv. Carstens 2018, wat anglismes in die hoofstuk oor taalsuiverheid bespreek) en deskriptiewe beskouings (bv. Donaldson 1991, wat anglismes binne die konteks van taalkontak en -verandering hanteer). In eersgenoemde beskouings is daar gewoonlik 'n 'negative value judgement on the term' (Donaldson 1991:61, spesifiek ook gesê oor Combrink 1984 se hantering van die begrip); in laasgenoemde beskouings val die klem op 'any instance of an English lexical, structural, and phonological element in [a language] that can be formally related to English' (Onysko 2007:90). Enige vorm van Engelse beïnvloeding deur taalkontak word dusdanig sonder enige waardeoordeel as anglisisties gesien (Onysko 2007:91), insluitende leksikale ontlening, kodewisseling, semantiese verskuiwings, leenmorfolgie, uitspraakverskynsels, of enige ander produktiewe gebruik van Engelsagtige konstruksies. In die res van hierdie artikel gebruik ek die term 'anglisme' vir beskouings van die eerste soort, teenoor die term 'Engelsheid' vir enige konstruksie wat onder Engelse invloed in Afrikaans waargeneem kan word.

Volgens my interpretasie van die literatuur oor *huidiglik*, is alle standpunte oor die vermeende anglisistiese aard van die woord gesetel in twee verbandhoudende argumente. Die een argument lui dat *huidiglik* 'n morfeem-vir-morfeem-vertaling van die Engelse *presently* (Combrink 1995c) is. Aangesien hierdie argument nêrens in die literatuur behoorlik beredeneer word nie, kan ons slegs aannames daarvoor maak. Ek vermoed dat *huidiglik* volgens hierdie siening geglosseer sal word soos in (8):

8. *huidig-lik*
 present-ADVZ
 'presently'

Daar is m.i. ten minste drie probleme met hierdie analise en argumentasie:

- Dié analise veronderstel die bestaan van *huidig*, terwyl agiteerders téén *huidiglik* juis beweer dat *huidig* nie in Afrikaans voorkom nie – slegs *huidige*. Hierdie twee

4. Vergelyk Onysko (2007:5): 'The problem of what is an anglicism has stirred intense debates and still remains inconclusive and controversial today.'

standpunte weerspreek en ondergrawe mekaar dus oor en weer.

- Die analise misken die feit dat *huidiglik* eintlik na regte (diachronies) geanaliseer moet word as *huid-ig-lik*, of te wel ([hede] ig] lik). As 'n mens wil argumenteer dat *huidiglik* 'n morfeem-vir-morfeem-vertaling van *presently* is, moet 'n mens dus veronderstel dat *presently* ook uit drie morfeme bestaan. Om daarby uit te kom, moet *present* teruggevoer word na die Latynse *præ* ('voor'), plus *esse* ('om te wees'), en dan moet *præ* gelykgestel word aan *hede* (of sy historiese allomorfe *huid*). Dit is vanselfsprekend 'n verkeerde analise.
- As die argument gevolg word, word die feit dat *presently* se primêre betekenis in Engels 'binnekort' is en dat die sekondêre betekenis 'tans; nou' is (vergelyk o.a. die *American Heritage Dictionary* 2016), ook misken.

Die ander argument hou hiermee verband, maar fokus sterker daarop dat *-lik* as adverbialiseerder onder Engelse invloed staan. Reeds in 1967 merk Van der Merwe 'n toename in die gebruik van *-lik* onder invloed van Engels op, maar volgens hom (Van der Merwe 1967:170) gaan dit oor die nadruksfunksie van *-lik* (terwyl hy niks oor die adverbialiseringsfunksie sê nie). Dit is egter glad nie duidelik op grond waarvan hy sê dat die Engelse *-ly* ook, soos in Afrikaans, 'n nadruksfunksie het nie.

Hiemstra (1980:72–73) blyk die eerste outeur te wees wat die opmars van *-lik* as adverbialiseerder aan die invloed van Engels toeskryf. In sy argumentasie dek hy egter twee opponerende standpunte: Aan die een kant is *-lik* as 'deftigheidsvorm' (volgens hom in 'ons ouer taal, veral Bybelse taal', met as voorbeelde *naarstiglik* en *goedgunstiglik*), of 'nadruksvorm' (waar hy wys op *sekerlik* vs. *seker*) aanvaarbaar, maar in die res van die gevalle nie, byvoorbeeld *vrywilliglik*, *onwettiglik* en *bitterlik* (Hiemstra 1980:73). Dit is spesifiek uit laasgenoemde voorbeeld wat die subjektiewiteit van die argument duidelik is: Waarom sou 'Sekerlik!' as antwoord nadruklik (en aanvaarbaar) wees, maar 'Dit is bitterlik koud' as stelling nie? Waarom sou *goedgunstiglik* as deftig (en aanvaarbaar) beskou kan word, maar *vrywilliglik* nie? Die rede waarom die laasgenoemde gevalle vermy moet word, is omdat dit volgens Hiemstra (1980) oortollig en onder Engelse invloed is. Hy bied helaas geen klarigheid oor waar die grense tussen die aanvaarbare en onaanvaarbare gevalle lê nie, en ek kan ook nie moontlike kriteria versin nie.

Myns insiens kan 'n mens met geen stelligheid sê dat *-lik* 'n anglisisme in Afrikaans is nie. Nog Kempen (1969) (wat *-lik* uitvoerig bespreek), nog Gous (1974) (wie se verhandeling spesifiek oor *-lik* handel) maak enige melding van Engelse invloed op *-lik*, terwyl Verhage (1965:310) eerder meen dat *-lik* 'aan die verhewe Bybeltaal ontleen is'. Met betrekking tot Nederlands sê Booij (2018) dat *-lijk* die 'Dutch adverbial suffix par excellence and thus ... on a par with English adverbialising *-ly*' is. Met 'n blik nog verder terug in die tyd meen Philippa et al. (2003–2009) dat *-lik* < *-lijk* 'al algemeen aanwezig in alle Oudgermaanse talen' was. Om dus slegs op die Engelse aard

van *-lik* in Afrikaans te fokus, ontken die groter Germaanse agtergrond en ontwikkelingspad van dié morfeem. Dit ontken ook die feit dat bywoorde verskillend in verskillende Germaanse tale ontwikkel (Diepeveen & Van de Velde 2010).

Deur nie op die anglisistiese aard van *-lik* te fokus nie, maar dit eerder te beskou as 'n Engelsheid, bied aan ons die geleentheid om die taalkontaksituasie in Suid-Afrika as nóg 'n motivering vir die konstruksionalisering van *huidiglik* (en ander bywoorde met *-lik*) te sien. Dié standpunt sluit aan by Donaldson (1991:209): '... English "*-ly*" may simply have acted as a contributing factor to the frequency with which adverbs in *-lik* are encountered in Afrikaans compared with standard Dutch'.

Tot slot: 'n Kerndeel van 'n anglisismeargument is gewoonlik dat die vermeende anglisisme 'iets *inheems* (dit wil sê 'n woord of uitdrukking wat reeds in Afrikaans is) *bedreig* of *verdring*' (Carstens 2018:352). Volgens dié argument verdring *huidiglik* vorme soos *nou*, *tans*, *deesdae*, *teenswoordig* (Carstens 2018:134), *op hierdie oomblik*, *in hierdie tyd* (HAT³) of soos *sake nou staan* (HAT⁶). Ook hier raak die taalpraktisyn en taalgebruiker in die war, want in teësprak met bogenoemde bronne, meen Combrink en Spies (1994) '[d]it is uit deftigdoenery dat gewone woorde soos *nou*, *vandag*, *deesdae* en *op die oomblik* vervang word deur AHI-woorde soos *tans*, *by hierdie geleentheid*, *in ons moderne tyd*, *huidiglik* (Amptenaraans), *heden* en *op hierdie oomblik in die tyd*'. [outeur se eie nadruk]. Daar is dus onder preskriptiwiste ook nie altyd eenstemmigheid oor wat aanvaarbaar is, al dan nie.

Desalnietemin, vir die anglisismeargument om te bly staan, moet 'n mens dus kan aantoon dat *huidiglik* met 'n hoër frekwensie as, of met 'n toename ten koste van hierdie alternatiewe woorde of frases voorkom. In Van Huyssteen (2018) word hierdie twee aspekte ook verreken.

Gevolgtrekking

Die woord *huidiglik* en sy basis *huidig* is al vir byna vier dekades 'n doring in menige taalkundige, taalpraktisyn, leksikograaf en taalgebruiker se vlees. Dit is boonop moontlik dié Afrikaanstalige grammatika- en stylkwessie wat die meeste in die openbare domein bespreek is. Ten spyte van alle besware deur preskriptiwiste, is beide woorde goed gevestig in eietydse geskrewe Afrikaans, soos blyk uit die ondersoek van Van Huyssteen (2018) – wat saam met hierdie artikel gelees moet word.

Die belangrikste bevinding van hierdie artikel is dat daar geen taalkundige besware teen *huidig(lik)* ingebring kan word nie. Stilistiese besware is meestal 'n kwessie van smaak, soos ook blyk uit talle gevalle waar taalkundiges en -praktisyns mekaar teëspreek oor wat aanvaarbare alternatiewe vir *huidig(lik)* is, of dit modieus of juis verouderd is, ensovoorts.

In antwoord op die preskriptiwistiese sienings, is daar in hierdie artikel 'n deskriptiwistiese benadering gevolg. Vanuit dié perspektief probeer 'n mens juis verstaan waarom 'n

woord soos *huidiglik* ontstaan het en steeds bly voortbestaan, ten spyte van die besware van gesaghebbendes. Binne 'n konstruksionaliseringsraamwerk is drie motiverings vir die bestaan van *huidiglik* aangebied:

1. Die morfeem *·lik* is 'n bekende en produktiewe adjektiveerder en adverbialiseerder in Afrikaans (en ander Wes-Germaanse tale). Dit is daarom nie vreemd dat *huidig_A* met *·lik* gesuffigeer word nie, selfs al sou dit oorbodig wees. Die verskynsel van oorbodigheid (kyk onder andere Braunmüller 2015; Langacker 2013:187–189; Wit & Gillette 1999), spesifiek ook morfologiese oorbodigheid, verdien verdere navorsing.
2. Dat *·lik* 'n nadruksfunksie het, word deur talle taalkundiges bevestig. Gegewe die grammatiese homonimie van *huidig_A* (d.i., dat dit as adjektief én bywoord kan funksioneer), word *·lik* ook gebruik om hierdie inherente meerduidigheid eksplisiet op te los.
3. Binne die taalkontaksituasie in Suid-Afrika kan die moontlike invloed van die Engelse *·ly* op die Afrikaanse *·lik* nie ontken word nie. Dit is egter om verskeie redes nie verrassend nie – en allermens verkeerd! – gegewe dat die wedersydse beïnvloeding tussen Afrikaans en Engels (beide Wes-Germaanse tale) al deeglik gedokumenteer is. Die invloed wat Engels op Afrikaanse taalverandering het, is so natuurlik soos die invloed van Engels op Nederlands en Duits, die invloed van Duits op Nederlands, Nederlands op Afrikaans, en so meer. Die adverbialiserende funksie van *·lik* kan dus as 'n Engelsheid beskou word, maar nie as 'n anglisisme nie.

Hierdie drie faktore werk gesamentlik en ewewig om die konstruksionalisering van *huidiglik* te motiveer. Of preskriptiwistiese bronne binnekort hierdie realiteit sal reflekteer, sal net die tyd leer.

Erkenning

Met dank aan Tom McLachlan en Suléne Pilon vir kommentaar op 'n eerste konsepweergawe van die artikel.

Mededingende belange

Die outeur verklaar hiermee dat hy geen finansiële of persoonlike verbintenis het met enige party wat hom voordelig of nadelig kon beïnvloed het in die skryf van hierdie artikel nie.

Literatuurverwysings

- AHD, 2016, *American Heritage Dictionary of the English language*, Houghton Mifflin Harcourt, Boston, MA.
- ANNA, 2011, *Pharos Groot Woordeboek Afrikaans en Nederlands*, Pharos, Kaapstad.
- Basson, J., 2006, *Politieke kaart op die tafel*, Politika, Kaapstad.
- Booij, G., 2010, *Construction morphology*, Oxford University Press, Oxford.
- Booij, G., 2018, -eljk, *Taalportaal*, besoek op 06 Mei 2018 by <http://taalportaal.org/taalportaal/topic/pid/topic-13998813292392024>
- Braunmüller, K., 2015, 'Competing tendencies in Germanic pronominal and deictic systems: The most general principle will prevail', in M. Hilpert, J.-O. Östman, C. Mertzlufft, M. Rießler & J. Duke (eds.), *New trends in Nordic and general linguistics*, pp. 11–27, De Gruyter, Berlin.
- Carstens, W.A.M., 1989, *Norme vir Afrikaans*, 1e uitg., Van Schaik, Pretoria.
- Carstens, W.A.M., 2003, *Verm y dit! NWU Nuusbrief*, Februarie, Noordwes-Universiteit, Potchefstroom.
- Carstens, W.A.M., 2018, *Norme vir Afrikaans*, 6e uitg., Van Schaik, Pretoria.
- Combrink, J.G.H., 1984, 'Wat is 'n anglisisme?', in T.J.R. Botha, J.G.H. Combrink & F.F. Odendal (uitsg.), *Inleiding tot die Afrikaanse taalkunde*, bl. 83–106, Academica, Pretoria.
- Combrink, J.G.H., 1993, 'Hoog praat is nie goed praat', *Die Burger*, 11 Januarie, bl. 7.
- Combrink, J.G.H., 1995a, 'Redes waarom "wettiglik," "naarstiglik" en "huidiglik" nie toutologieë is nie', *Beeld*, 23 Januarie, bl. 7.
- Combrink, J.G.H., 1995b, 'Woordeboek nie altyd op datum', *Die Burger*, 26 Junie, bl. 11.
- Combrink, J.G.H., 1995c, 'Geforseerde "huidiglik" kom uit Amptenaraans', *Beeld*, 6 Maart, bl. 7.
- Combrink, J.G.H., 1996, "'Huidiglik" korrek as 51% so sê', *Beeld*, 7 Oktober, bl. 7.
- Combrink, J.G.H. & Spies, J., 1994, *Sakboek van regte Afrikaans*, Tafelberg, Kaapstad.
- De Villiers, M., 1959, *Norme en afwykinge in die taal*, Nasionale Pers, Kaapstad.
- De Villiers, M., 1981, 'Modeverskynsels in die taal', *Die Kerkbode* 133(21), 4.
- De Villiers, M., 1986, 'Los liewer "lik" in Afrikaans', *Rapport*, 20 April, bl. 15.
- De Vries, M. & Te Winkel, L.A. (reds.), 1864–1997, *Woordenboek der Nederlandsche taal [WNT]*, Martinus Nijhoff, 's-Gravenhage.
- Diepeveen, J. & Van de Velde, F., 2010, 'Adverbial morphology: How Dutch and German are moving away from English', *Journal of Germanic Linguistics* 22, 381–402. <https://doi.org/10.1017/S1470542710000115>
- Donaldson, B.C., 1991, *The influence of English on Afrikaans: A case study of linguistic change in a language contact situation*, Academica, Pretoria.
- Du Plessis, E.P., 1979, *Die kennis gids tot moderne Afrikaans*, Human & Rousseau, Kaapstad.
- Du Plessis, E.P., 1981, *Die kennis gids tot moderne Afrikaans*, Human & Rousseau, Kaapstad.
- Eksteen, L.C., 1985, *Woord vir woord: Kort bydraes oor die woordeskat van Afrikaans*, Macmillan, Johannesburg.
- Gous, J.A., 1974, *Die morfeem-lik in Afrikaans*, Ongepubliseerde meestersverhandeling, Wits Universiteit, Johannesburg.
- Hengeveld, K., 1992, *Non-verbal predication: Theory, typology, diachrony*, Mouton de Gruyter, Berlin.
- Hengeveld, K., Rijkhoff, J.A.N. & Siewierska, A., 2004, 'Parts-of-speech systems and word order', *Journal of Linguistics* 40, 527–570. <https://doi.org/10.1017/S0022226704002762>
- Hiemstra, L.W., 1980, *Die juiste woord*, Tafelberg, Kaapstad.
- Hummel, M., 2014, 'The adjective-adverb interface in Romance and English', in P. Sleeman, F. van de Velde & H. Perridon (eds.), *Adjectives in Germanic and Romance*, pp. 35–71, John Benjamins, Amsterdam.
- Hüning, M. & Booij, G., 2014, 'From compounding to derivation – The rise of derivational affixes through "constructionalization"', *Folia Linguistica* 48, 579–604. <https://doi.org/10.1515/flin.2014.019>
- Kapp, S., 2014, 'Oor "huidiglik"', *Facebook*, besoek op 8 Desember 2017, by <https://www.facebook.com/Taalkommissie/posts/798646713525292>
- Kempen, W., 1969, *Samestelling, afleiding en woordsoortelike meerfunksionaliteit in Afrikaans*, Nasou, Kaapstad.
- Kirsten, J., 2015, *Historiese korpus van Standaardafrikaans 1.0. [HKSa]*, Noordwes-Universiteit, Vanderbijlpark.
- Kirsten, J., 2016, *Grammatikale verandering in Afrikaans van 1911–2010*, Ongepubliseerde PhD-proefskrif, Noordwes-Universiteit, Vanderbijlpark.
- La Grange, A.B., 1973, 'Tweejaarlikse wetenskaplike kongres en 68ste algemene jaarvergadering, Unisa, Pretoria, 15–19 Oktober 1973, Presidentsrede', *Journal of the South African Veterinarian Association* 45(1&2), 15–20.
- Langacker, R.W., 2013, *Essentials of cognitive grammar*, Oxford University Press, Oxford.
- Luther, J. & Pfeiffer, F. (reds.), 2013, *HAT taal- en feitegids [HAT language and fact guide]*, Pearson, Kaapstad.
- Luther, J., Pfeiffer, F. & Gouws, R.H. (reds.), 2015, *Handwoordeboek van die Afrikaanse taal*, 6e uitg., Pearson, Kaapstad.
- Müller, D., 2003, *Skryf Afrikaans van A tot Z*, Pharos, Kaapstad.
- Müller, D. & Pistor, S., 2011, *Skryf Afrikaans van A tot Z*, Pharos, Kaapstad.
- Odendal, F.F. (red.), 1994, *HAT: Verklarende handwoordeboek van die Afrikaanse taal*, 3e uitg., Perskor, Midrand.
- Onysko, A., 2007, *Anglicisms in German: Borrowing, Lexical Productivity and Written Codeswitching*, De Gruyter, Berlin.
- Philippa, M., Debrabandere, F., Quak, A., Schoonheim, T. & Van der Sijs, N., 2003–2009, *Etymologisch Woordenboek van het Nederlands*, Amsterdam University Press, Amsterdam.
- Prinsloo, A.F., 2003, "'Huidiglik" – 'n sondebok (bet. 1)!", in W.F. Botha (red.), *'n Man wat beur*, bl. 305–313, Buro van die WAT, Stellenbosch.
- Prinsloo, A.F., 2013, 'Taalkruie: Huidiglik agterbaks', *Volksblad*, 29 Augustus, bl. 7.
- Prinsloo, A.F. & Odendal, F.F., 1995, *Afrikaans op sy beste: Hulp met moderne taalkwessies*, Van Schaik, Pretoria.

- Scholtz, J.J.J., 1990, 'Onbekend: Oor huidiglik', *Die Burger*, 23 Julie, bl. 11.
- Spies, J., 1990, 'Onbekend: Oor huidiglik', *Die Burger*, 07 Mei, bl. 9.
- Taalkommissie van die SA Akademie vir Wetenskap en Kuns, 2017, *Afrikaanse Woordelys en Spelreëls*, 11e uitg., Pharos Woordeboeke, Kaapstad.
- Theron, A.S., 1964, *Aspekte van die bywoord in Afrikaans*, Ongepubliseerde meestersverhandeling, Universiteit Stellenbosch, Stellenbosch.
- Traugott, E.C. & Trousdale, G., 2013, *Constructionalization and constructional changes*, Oxford University Press, Oxford.
- Van der Merwe, H.J.J.M., 1956, *Afrikaanse taalkwessies*, Van Schaik, Pretoria.
- Van der Merwe, H.J.J.M., 1967, *Die korrekte woord: Afrikaanse taalkwessies*, Van Schaik, Pretoria.
- Van der Merwe, H.J.J.M. & Poneis, F.A., 1982, *Die korrekte woord: Afrikaanse taalkwessies*, Van Schaik, Pretoria.
- Van der Merwe, H.J.J.M. & Poneis, F.A., 1991, *Die korrekte woord: Afrikaanse taalkwessies*, Van Schaik, Pretoria.
- Van Huyssteen, G.B., 2017, 'Morfologie', in W.A.M. Carstens & N. Bosman (reds.), *Kontemporêre Afrikaanse taalkunde*, 2e uitg., Van Schaik, Pretoria.
- Van Huyssteen, G.B., 2018, "n Korpusondersoek na "huidiglik", *Literator* (Ter perse).
- Van Schoor, J.L., 1983, *Die grammatika van standaard-Afrikaans*, Lex Patria, Kaapstad.
- Van Veen, P.A.F. & Van der Sijs, N., 1997, *Etymologisch woordenboek: De herkomst van onze woorden*, Van Dale Lexicografie, Utrecht.
- Van Wijk, N., 1936 [1912], *Franck's Etymologisch woordenboek der Nederlandsche taal*, M. Nijhoff, Den Haag.
- Verhage, J.A., 1965, 'Deftige en gemeensame vorme in die sinsverband van ou Kaapse taal', *Tydskrif vir Geesteswetenskappe* 5, 307–323.
- Viva-KPO: Virtuele Instituut vir Afrikaans, 2017, *Korpusportaal: Omvattend*, besoek op 30 April 2018, by <http://viva-afrikaans.org>.
- Wiktionary, 2018, 'heutig', besoek op 30 April 2018, by <https://en.wiktionary.org/wiki/heutig>
- Wit, E.-J.C. & Gillette, M., 1999, *What is linguistic redundancy?*, Technical report, University of Chicago, Chicago, IL.